

Belun Tenta atu Hamenus Buatus Konaba Ai-Kulit Aat iha Subdistritu Letefoho (Ermera) no Subdistritu Lospalos (Lautem)

Media Imprensa liga ba Insidente Violensia durante periodu Novembru

NGO Belun, 12 Dezembru 2012

NGO Belun, liu husi programa Atensaun no Responde Sedu (AtReS) hetan dadus monitorizasaun konaba insidentes violensia ne'ebé mosu iha rai laran no publika iha website www.belun.crowdmap.com

Rezultadu monitorizasaun insidente violensia iha fulan Novembru 2012, relata hamutuk (83). Insidente sira ne'e ho tipu violensia: Dun malu kaer aikulit aat (10), Violensia entre Juventude (26), Violensia tanba konsumu Alkohol (5), Disputa Rai (6), ema deskuñesidu asalta ema (6), Violensia enentre membru familia (7), Arte marsiais (2), Animal tama toos (1), Tensaun konflitu iha fronteira (2), Movimentu CPD-RDTL (1) no mós relata krime seluk hamutuk (15).

Husi insidente 83, tendensia konflitu sae makas iha Subdistritu Letefoho, Ermera Vila (Ermera) liga ho rumoris hanesan grupu 51. (Grupú 51 signifika katak, ema pesoal ida tenke iha membru nain lima, bele utuliza aimoruk hodi halo asaun ruma). Impaktu husi rumoris ne'e, halo familia ho familia, vizinhu ho vizinhu no comunidade sira deskunfia ba malu, tauk ba malu, nune mós movimentu iha merkadu menus.

Husi insidente 10 ne'ebé mosu tamba membrus comunidade dun malu kaer aikulit aat, 9 akontese iha Ermera no ida iha Liquiça. Imapktu husi insidente 9 iha Ermera ne'e inklui ema rua mate derepente hafoin hemu tua hamutuk ema seluk, nomos insidente ida-idak rezulta ema kanek tamba ema diskonfia malu.

Parte seluk, iha Subdistritu Lospalos, Distritu Lautem, impaktu husi veneno lanu Estudante iha eskola Primaria Iralafae, Subdistritu Lospalos lautem), iha Outubru. To'ó agora comunidade sira kontinua deskunfia ba malu, tauk ba malu, nune'e mós bainhira lao ba mai, eme preve atu la konsumu be'e no hahan iha fatin ne'ebé vizita ba, tanba tauk.

Bazeia ba rezultadu ne'e, NGO Belun hato'ó rekomendasaun ba:

- Polisia Nasional Timor Leste (PNTL) husi nivel nasional bele fo apoiu ba PNTL subdistritu Letefoho hodi bele aumenta patroliá iha area ne'ebé identifika tendensia konflitu sae nomos halo investigasaun klean ba rumoris hirak ne'e hodi bele hamosu faktus no evidensia.
- Belun mos husu ba Ministériu Publiku no Tribunal Distritu atu bele dudu prosesu justisa atu lao lailais ba kazu veneno lanu estudante iha Eskola Primaria Iralafae (Lautem), nune'e comunidade bele hatene justisa lao duni.
- Lideransa Relijiaun sira, atu bele fó mensagen iha Igreja katak membrus comunidade sira la bele halo asaun violensia ba malu no dun malu tamba la iha evidensia. Se karik diskonfia ema presija lori ba PNTL tamba polisia nia papel mak atu resposta ba insidente laos sidadaun-nian.

- Husu mos ba lideransa komunitaria no governu lokal sira bele realiza sorumutu ho komunidadade hodi bele identifika klean konaba asuntu buatus grupu 51 hodi bele hamenus paniku iha komunidadade no transforma informasaun hodi tensaun la bele sai a'as.
- Belun rasik presija kontinua monitorizasaun no buka infomasaun klaru konaba insidente hirak ne'ebé akontese. Belun sei kontinua halo kooperasaun iha nivel subdistritu ho PNTL no autoridade sira no kontinua fahe infomasaun klaru ba malu. Belun sei fo apoiu ba lideransa lokal sira atu fasilita sorumutu no reforsa ba komunidadade atu labele tau atensaun barak liu ba rumoris hirak ne'e tamba la iha evidensia.

Belun nuudar NGO independente ida, servisu ba prevensaun konflitu no harii dame. Belun prontu atu simu informasaun husi ema ne'ebe hakarak halo konfirmasaun konaba dadus insidentes.

Marilia Oliveira da Costa
Program Manager-Belun
www.belun.tl
www.belun.crowdmap.com
7727-6671